



Fasnacht 2018

Sujet: **30 Mol Fasnacht grandios zum erste Mol Sujet los**

Euses Sujet soll euch nit irritiere
und jo mir chönne scho wieder jubiliere
drum hämer nit lang müesse studiere
möchte die letschte 29 Joor Revue passiere.

1989 hämer dr erscht Umzug gha
sind drei Wuche vor dr Fasnacht an Wagebau dra
in Rhyfelde het me neu Biertanks gmacht ganz schnell
mir fiere das mitem Sujet: **"Feldschlössli- Grossbaustell"**
s'Joor druf het s'Komitee es Jubiläum gmacht
euses Sujet: **"25 Joor Prattler Dorffasnacht"**
denn närvts Schwizer Fernseh viele Lüt
au uns, drum finde mir: **"TV DRS viel für nüt"**
drufabe hämer s'Problem mit dr schnälle Poscht gseh
und säge drum: **"Oh je mi nee die PTT"**
denn scho s'5 Jährige als Föörwehrfraue, dass säg i dir
mitem Sujet: **"Jetzt sprütze mir"**

Im 94 gits Wy vom Wystübli guet und gsund
euses Sujet: **"Proscht im Leuegrund"**
ei Joor spöter hesch überall chönne Pizza ha
au bi uns mitem Sujet: **"Pizza-Mania"**
denn het halb Europa gstreikt, me weiss es genau
mir mache glich Fasnacht säge aber: **"Mir streike au"**
im nächschte Joor hämer kei Idee eus quält's
drum Sujet: **"Eus fehlt's-euch fehlt's-wiso fehlt's?"**
bim 10.Joor hämer, s'kennt jede Dotschi
als Sujet die Eier mitem Name: **"Tamagotschi"**

S'Joor druf chasch nümme durch's Dorf mitem Charre
drum mache mir Fasnacht als: **"Hauptstroosnarre"**
denn baue mir e Skihütte gar nit gruusig
mitem Sujet: **"Mir snöbe ins Joor 2000"**
s'nächschte Sujet isch dass wo jede kennt

mir händs: **"Waggis hesche mir eine Orantsche"** gnennt
en Gottesdienscht am Waldfescht s'Leschte bald
daher s'Sujet: **"Halleluja im Geisswald"**
bi dr 15.Fasnacht was uns sehr betrifft
het's im Coop jo ine gschifft
drum isch sie unter Wasser wie famos
eusi Idee für: **"S'Hallebad an dr Bahnhofstroos"**

Dr heissi Summer macht Sorge und Kummer
mir spieles us mit: **"Dr Joorhundert Summer"**
in Basel git's d'Usstellig vom Ägypter mit Ruhm
mir zelebrieres als Pharao: **"Tut chumm und mach mum"**
denn närve eus d' Isproche vom VCS bereits
als Sujet: **"Verhinderigs Club Schweiz"**
im 2006 hets leider ab em Samschtig immer gschneit
und eus isch in dr Nacht dr Wage zämmegheit
Dorfturnhalle isch denn fertig inklusiv Vitrine wo soll blibe
so froge mir: **"Het Prattele jetzt e Schiibe?"**
de nächscht Wage als Dorfbrunne, dass macht Sinn
und mir als schwarz/roti Waggis drin
no wit und breit kei Spur vonere Abnützig
drum Sujet: **"20 Joor und immer no sprützig"**

Bi dr Fuessball-EM het's viele Holländer Fanje
au mir sage als Frau Antje: **"Mir gsehn nume no Oranje"**
denn chunnt dr Kreiselwahn mir mache mit
euses Sujet: **"Lauft's rund oder nit?"**
die folgend Fasnacht warne mir als Chemiehäxe ohni Gag
"Ene mene Adlerschregg puff und Prattele isch weg"
s'nächscht Sujet betrifft e Alass de isch nur no es Stümpeli
mir meine drum: **"Bsuecherrekord am Grümpeli"**
denn fiere mir es het eus gwundert
scho es Viertel Joorhundert
als alti Tante und Männer oje wie gföhrli
mitem Sujet: **"25 Jöörli und keini graue Höörli"**

S'Joor druf hesch chönne in Züri im Auto pope
drum Sujet: **"Zum pope in de Boxe stoppe"**
denn het Prattele Parkplätz gmolt wie nit ganz bache
mir gsehnd das als: **"Kunstszene Prattele"** findes zum Lache
drufabe das Gschiss mit dr FIFA und em Fuessballvater
mir als Blatter Sepp und nennes: **"S'Mafi(f)a-Theater"**
denn leschti Fasnacht sind mir als Gondolieri voll drby
und: **"Mol öbis Neus...Venedig bi eus"** isch s'Sujet gsi

So jetzt tüent ihr eusi vergangene Sujet kenne
eus gsehsch an dr Fasnacht wenn de nit tuesch penne
do hätte mir grad no e gratis Tip
mir finde das dr absoluti Hit
uf eusem Traktorgstell das isch nit chli
hänge 29 Bilder also e Gallerie
und mir händ jetzt gnueg Zyt zum es Sujet sueche
schöni Fasnacht wünsche euch d'Dorfplatzrueche

